

四庫全書

史部

欽定四庫全書

史部

欽定八旗通志卷

一百五十一  
一百五十一

欽定四庫全書

欽定八旗通志卷一百五十

人物志三十

大臣傳十六

滿洲正黃旗四 愛星阿 布舒庫  
沙納哈 麻勒吉 安珠瑚 伊

桑阿 喀齊蘭 穆占 巴琿岱

愛星阿 子富善

愛星阿滿洲正黃旗人姓舒穆祿額駙揚古利孫  
也順治四年襲父塔瞻一等公八年

世祖章皇帝追念揚古利功加給愛星阿三等輕車都尉  
俸尋授領侍衛內大臣十六年大軍征雲南明桂  
王朱由榔與其黔國公沐天波等奔緬甸其晉王  
李定國奔孟艮鞏昌王白文選奔木邦

世祖命吳三桂移平西藩屬鎮雲南十七年三桂疏請發  
兵入緬滅由榔以除邊患愛星阿奉

勅為定西將軍與都統卓羅果爾欽遜塔護軍統領畢力  
克圖費雅思哈前鋒統領白爾赫圖等率禁旅會

同三桂進征十八年九月督兵次大理秣馬逾月  
出騰越州取道南甸隴川猛卯十一月至木邦擒  
白文選所遣之副將馮國恩訊知李定國走景線  
文選與定國不睦屯兵錫箔江濱愛星阿令白爾  
赫圖費雅思哈果爾欽遜塔畢力克圖等先簡精  
銳疾馳三百餘里至江濱文選已毀橋遁走茶山  
大軍繼至結筏以濟別遣總兵馬寧沈應時追剿  
文選愛星阿同三桂領兵趨緬先是三桂屢檄諭

緬人令擒獻由榔緬酋莽猛白盡殺由榔從官沐  
天波王維恭馬吉翔魏豹等數十人密使人防守  
由榔謀生擒以獻十二月大軍次舊挽坡離緬城  
六十里緬使人詣軍門請遣兵百人薄城愛星阿  
遣白爾赫圖率前鋒百人進次蘭鳩江濱復令畢  
力克圖等率護軍二百居後策應緬人聞大兵將  
薄城以船載由榔與其親屬及故從官妻女獻之  
軍前時文選為馬寧等追及於猛養度不能脫率

衆數千降定國竄死猛臘康熙元年奏捷

聖祖仁皇帝優旨嘉獎

諭以所俘獲委三桂區處愛星阿振旅還京仍為內大臣  
加少保兼太子太保增紀軍功於世襲一等公

勅書三年二月卒

恩卹其家白金三千兩

賜祭葬如典禮謚敬康子富善襲一等公爵十九年授領

侍衛內大臣三十五年二月

聖祖以噶爾丹背約肆逞分路進討

命撫遠大將軍費揚古出西路

親統大軍出中路富善領鑲紅旗兵隨

御營

駕駐沙河

諭富善曰古北口一路兵衆以爾統率所過城池村舍遵

朕法令毋絲毫擾累其有以捕獸馳騁竭馬力者並飭

禁之四月



駕駐西巴爾臺離噶爾丹所居之克魯倫河計程五日議  
者謂宜俟西路兵會剿富善奏言西路兵至尚遲  
恐賊聞風逃竄即以中路兵剿賊未為不足宜乘  
其不備速擊之奏入稱

旨

命仍進征克魯倫河會噶爾丹知

上親征盡棄其廬帳器械潰竄

上已密諭費揚古等絕其歸路先整兵特勒爾濟口以待

陣斬二千餘級噶爾丹僅以身免厄魯特部衆千

餘來降

上乃命班師每

行營開選駝馬徵輸芻粟富善承

旨以行咸當

上意叙功加太子太保嘗扈

蹕至會岐口有疾

上親臨視

賜醫藥四十七年卒

賚白金二千兩

遣官經紀其喪

予祭葬如典禮以其子海金襲一等公雍正八年

勅建賢良祠愛星阿富善並入祀乾隆元年追謚富善曰

恭懿

布舒庫

父納爾泰

布舒庫滿洲正黃旗人姓吳魯父納爾泰任佐領

世祖章皇帝順治六年隨征大同叛鎮姜瓖率其子噶爾琿納什庫力戰歿於陣

恩卹如例布舒庫其長子也於順治五年任護軍校隨征南大將軍譚泰征江西叛鎮金聲桓攻饒州府先登克其城十五年隨征南將軍卓卜特征明桂王朱由榔由廣西進貴州濟師盤江敗之於梁瑞津其餘衆屯踞山隘我兵環山圍攻布舒庫首衝敵陣奮擊斬殪甚衆師至雙河口其晉王李定國以數

萬衆列柵山巔布舒庫先衆踰險而上遂奪其寨  
定國復列象陣來犯布舒庫率衆力戰逐北四十  
里雲南平凱旋予雲騎尉世職

聖祖仁皇帝康熙二年授叅領十六年二月擢正黃旗蒙  
古副都統列議政大臣時逆藩吳三桂賊黨韓大  
任等據吉安簡親王喇布奉

詔剿賊日久未下

特命布舒庫同都統勒貝護軍統領哈克三叅贊軍務韓

大任等尋自吉安潰圍遁據寧都布舒庫率兵至永豐與提督趙賴合師計以三路進攻值大任等來犯布舒庫同趙賴發礮擊之賊退據山寨布舒庫督兵圍攻賊衆由山徑下衝我兵兩路截擊賊敗歸山寨布舒庫緩師以誘之賊弗敢出相持月餘賊夜遁布舒庫率步兵追及之斬賊千餘級擒其偽參將王朝斌偽軍師萬蒙羅等賊走泰和萬安竄入福建十七年正月布舒庫同哈克三追剿大

任擊賊於福建老虎洞鞍子嶺斬賊六千餘級分遣叅將李天柱等由七嶺隘口奪關而進斬偽官五追擊至天花山大陂嶺賊窮蹙適康親王傑書遣布政使姚啟聖招撫大任乞降布舒庫同哈克三旋師隨簡親王與征南將軍穆占會師於湖南互詳哈克三傳七月吳逆犯永興水陸道阻穆占奏遣布舒庫率兵携礮同署副都統尼雅翰駐守永興河岸以禦之賊黨胡國柱馬寶等以衆三萬

來犯布舒庫擊卻之及賊潰圍解布舒庫同穆占  
進攻耒陽偽將軍吳國貴夏國相等敗遁十八年  
二月進定常寧布舒庫同前鋒侍衛塔勒岱屢擊  
賊於白水市蔡家店大春橋桂山斬馘甚衆進追  
至翟里橋賊擁衆拒敵我兵衝擊之擒其偽參將  
守備各二距永州四十里與穆占合師進攻永  
州城賊夜渡湘江燒桴橋而遁乃分遣總兵蔡元等  
收復新田寧遠道州永明江華東安各城先後招



降偽總兵李魁李福管世雄陳邦賢等偽官三百  
餘旋令陳邦賢率所屬兵與叅將王因俊攻廣西  
全州擊賊於飛鸞橋克其城進定興安又分遣別  
將收復灌陽恭城富川招撫萬陽山偽總兵郭世  
隆吳漢興等還定新寧與簡親王合軍於武岡九  
月鎮南將軍莽依圖規取雲南疏請調兵防守廣  
西

詔簡親王率師駐守桂林仍以布舒庫叅贊十九年正月

調正黃旗滿洲副都統三月降鎮馬承蔭復叛布  
舒庫隨簡親王與將軍莽依圖總督金光祖分路  
進剿六月克雄容縣合攻郴州府馬承蔭降七月  
布舒庫以疾卒於軍櫬還

上遣大臣迎奠茶酒

賜祭葬如典禮謚剛壯

沙納哈

沙納哈滿洲正黃旗人姓伊爾根覺羅

世祖章皇帝順治六年由閒散隨敬謹親王尼堪討大同  
叛鎮姜瓖攻克左衛城先登第一

賜號巴圖魯予騎都尉世職九年遇

恩詔加一雲騎尉十三年署叅領隨寧海大將軍伊爾德

征浙江舟山至定海縣同副都統根特擊敗偽英

毅伯阮思等偽總制陳六御率衆來犯沙納哈同

副都統柯永蕃擊卻之追至衡水洋斬六御等遂

取舟山十四年九月叙功晉世職三等輕車都尉

十六年海賊鄭成功犯江寧沙納哈隨安南將軍  
達素等往征比至賊已遁移師福建十七年由同  
安剿賊於廈門沙納哈仍署叅領率兵為前隊乘  
船進戰失利面項中二矢退回尋還京

聖祖仁皇帝康熙元年論廈門水戰捨舟登陸罪應革巴  
圖魯號及三等輕車都尉以受傷重免籍沒鞭責  
得

旨給還騎都尉四年授駐防西安佐領九年三月尚書科

爾擴岱侍郎達哈塔等奉

命閱大草灘邊界至西安沙納哈呈告自十六歲披甲十九歲從征大同得功後屢署叅領因獲罪降職不得照原品補用乞代請回京遇出征之處効力科爾擴岱等以奏下部議准令還京十年二月授叅領十三年三月逆藩耿精忠叛應吳三桂沙納哈時隨大軍駐防兗州

詔移軍江西沙納哈兼署前鋒叅領七月耿逆偽都督易

明引賊四萬餘犯撫州沙納哈領右翼前鋒兵合  
諸軍擊之斬賊二千有奇九月賊由建昌府來犯  
定南將軍希爾根令率前鋒兵百會兩藍旗兵擊  
賊斬獲甚多十月叛鎮楊富之弟偽將軍楊三盤  
據許灣之偽總兵李茂著合賊萬餘掠撫州平寇  
將軍哈爾噶齊令沙納哈領八旗前鋒兵同護軍  
統領瓦岱等進攻斬級四千餘楊三李茂著俱中  
箭溺水死十四年正月隨安親王岳樂進兵瑞州

時賊陷上高賊衆萬五千據瑞州之會浦沙納哈  
率頭隊兵同護軍統領桑額奮擊之追奔二十餘  
里生擒偽官十餘賊兵百餘斬偽總兵朱一典謝  
以泰及偽軍師李姓滕姓等恢復上高偽都督阮  
國棟聚二萬餘賊據新昌縣北山沙納哈同諸將  
進剿斬賊四千擒偽副將叅將各一千總三及賊  
兵五十餘新昌亦平十五年二月安親王剿吳三  
桂之偽將軍夏國相李良棟等於袁州之萍鄉縣

賊據城東來龍山高阜立寨十二掘壕築壘以待大  
兵分四隊環攻賊敗潰沙納哈率前鋒兵截殺之  
賊兵一萬三千得脫者僅四百國相等尋棄印劄  
軍械而遁十八年二月進兵湖南湘潭縣賊望風  
卻走復其城三月遷正黃旗蒙古副都統七月擢  
前鋒統領八月夏國相偕賊黨吳國貴王永清  
王宏勳等據武岡州之雙井堡偽將軍馬寶張  
祖法等擁賊二萬四千與大軍相拒沙納哈領前



鋒兵三百進擊賊勢披靡追剿至楓木嶺賊皆遠  
竄二十年擊走偽將軍線緘於盤江西坡進征雲  
南駐營歸化寺逆孽吳世璠遣偽將軍劉杞龍  
胡國柄等驅賊兵列象陣相抗沙納哈偕諸軍  
擊敗之追至城下陣斬胡國柄劉杞龍及偽總兵  
九員生擒六百餘人是年雲南平隨大軍凱旋二  
十三年五月調護軍統領十二月擢正黃旗蒙古  
都統尋列議政大臣二十六年正月因病解任四

月卒

賜祭葬如例子尚德襲騎都尉

麻勒吉

麻勒吉滿洲正黃旗人姓瓜勒佳先世居蘇完有  
達邦阿者當

太祖高皇帝時來歸麻勒吉其曾孫也

世祖章皇帝順治八年定滿洲蒙古與漢軍漢人分試之

制麻勒吉以繙譯取中舉人明年會試第一名

殿試一甲一名授修撰十年五月

上諭吏部曰修撰麻勒吉同庶吉士教習有志向學兼通  
滿漢文義其氣度亦老成遇侍讀學士缺即行推補於是  
遂授宏文院侍讀學士十二月擢宏文院學士十  
二年始設

日講官以麻勒吉同學士胡兆龍等充之旋同學士  
禪岱胡兆龍李霽教習庶吉士時編纂

太祖

太宗聖訓又

詔刪訂歷代通鑑並充副總裁十四年九月充

經筵講官時偽秦王孫可望赴經畧洪承疇軍納款  
詔封為義王麻勒吉充正使偕副使胡兆龍奇徹伯齋  
勅印至湖南遂攜可望入

觀初麻勒吉與直隸總督張元錫同官學士有年及使還  
過於順德呵辱之元錫憤懣是夕引佩刀自刎不  
殊巡撫董天機取其手疏入奏有上官過客苛索

凌虐語

上遣學士哲庫訥侍郎霍達等往察其事元錫復疏言正使麻勒吉於候迎時面斥失儀又責以前此南行不一出迎且云在南方時洪經略日有饋遺何等盡禮臣當使臣啟行時方往閱登萊海汛勢難舍未竟之事來而復往其苛求已可槩見又副使竒微伯索臣駝羸臣因賄賂干禁不與其蓄怒自難解釋此臣所以引佩倉皇也疏入得

旨張元錫以總督大臣輕生自刎必有逼迫情由朕早鑒  
及故特行詳察覽奏具悉實情麻勒吉等奉命出使敢  
於逼迫大臣任意妄行深負委任之恩九卿科道會勘  
從重議處元錫尋以集質至京讞未竟宿於僧寺自縊  
死九卿等以麻勒吉胡兆龍奇徹伯沿途受饋復  
借端苛索逼總督自盡均應革職籍沒議奏

詔從寬削加級追奪誥敕降二級留任十六年六月

上以雲南新闢發帑金三十萬兩分賑貧民

命麻勒吉同尚書伊圖左都御史能圖往董其事尋奉

命同能圖察奏大軍取永昌後貝勒尚善等縱兵擾民狀

為之辯釋十七年四月又奉

命同學士石圖往雲南會商進剿明桂王朱由榔機宜還

奏七月安親王岳樂等覆勘兵入永昌城掠民婦

女事得實麻勒吉與能圖並坐徇隱罷任罰鍰十

八年正月

命以原銜入直七月授秘書院學士康熙三年同學士章

雲鷺教習庶吉士五年擢刑部侍郎七年十二月授江南江西總督九年疏言淮揚二府屬丈量虧缺田地有坍沒已久者請永行蠲免歲賦有新被水淹者暫予停徵又言五月間淮黃暴漲湖水泛溢田畝廬舍被淹者多請以正項錢糧賑濟災民時蘇州松江二府頻遭水患布政使慕天顏議濬劉河淤道二十九里濬吳淞江使復舊規建閘以時蓄洩麻勒吉與巡撫瑪祜疏請以漕折銀十四



萬兩充費並得

旨俞允十年四月京口將軍李顯貴鎮江府知府劉元輔

為駐防兵丁訐告侵冒錢糧

上遣侍郎勒德洪往勘得實麻勒吉以不先舉發逮問江

南百姓赴京籲留給事中姚文然疏述以

聞並言麻勒吉情罪輕重尚待確訊宜釋鎖繫得

旨俞允部議應降二級調用復得

旨仍回原任八月疏言州縣繁簡不同人才短長各異或

才具有餘諳達吏事而適當簡僻其精神力量無所施展或撫字為懷廉潔自守而驟膺繁劇拮据不逮終於顛蹶請酌行調繁調簡之法俾人地相宜以盡器使之道疏下部議以州縣改調恐開趨避之端寢其事十二年遇計典部院察議麻勒吉復任總督後未見勤勉應降二級調用尋降補兵部督捕理事官十六年

命赴簡親王喇布軍招撫叛附吳三桂之孫延齡馬雄等

十八年奉

詔率兵鎮守桂林先是孫延齡為廣西將軍所轄將士皆  
舊隸定南王孔有德者及孫延齡為吳三桂從孫  
世琮所殺其部將劉彥明徐洪鎮徐上達等率部  
衆歸順至是

詔麻勒吉統轄之麻勒吉奏授彥明洪鎮等都統副都統  
有差尋以巡撫傅宏烈率兵討賊

詔麻勒吉攝巡撫事十九年大兵由廣西進征雲南麻勒

吉奉

詔籌運軍餉時吳逆偽將軍黃明來降麻勒吉奏請錄用  
詔授援剿總兵黃明仍叛遁

詔麻勒吉與偏沅巡撫韓世琦會剿麻勒吉尋以黃明為  
苗人所殺疏報二十一年撤定南藩屬分隸八旗  
漢軍麻勒吉率之還京二十三年授提督九門步  
軍統領二十八年三月卒三十七年黃明為貴州  
叅將官斌廣西遊擊田國璽等擒獲於大樂山苗

尙伏誅部議麻勒吉前此妄報追革原官

安珠瑚

安珠瑚滿洲正黃旗人姓瓜勒佳先世居蘇完父

阿喇穆任佐領

世祖章皇帝順治元年隨睿親王多爾袞入山海關擊流

賊李自成力戰陣亡

恩卹如例予雲騎尉世職以其兄之子錫特庫襲尋卒安

珠瑚襲三遇

恩詔晉世職至三等輕車都尉任叅領兼刑部郎中九年  
隨敬謹親王尼堪征湖南王至衡州率輕騎先進遇  
賊伏歿於陣安珠瑚時隨貝勒屯齊軍後至聞  
王戰歿突入敵陣得王屍以還十三年隨寧海大  
將軍伊勒德剿海賊於舟山賊敗遁叙功晉二等  
輕車都尉十八年隨靖東將軍濟什哈剿山東土  
賊于七擒斬賊黨甚衆

聖祖仁皇帝康熙六年擢寧古塔副都統十年增設吉林

烏拉副都統調安珠瑚任之時安珠瑚與寧古塔將軍巴海奏遷松花江新滿洲札努喀布克托等各姓戶口於所屬境內編四十佐領令札努喀等分轄其衆十七年

諭獎巴海暨安珠瑚實心任事撫輯新滿洲戶口咸令得所下部議叙晉世職為一等輕車都尉兼一雲騎尉旋擢

盛京將軍十九年疏請裁金州巡檢改為金州營設

守備千總等官以招徠民戶五百餘丁選兵百分  
習騎射標鎗烏鎗又請於沿邊展界二十餘里設  
柵隘口移兵防守疏並下部議行二十一年

上詣盛京

巡行邊地見立界處枯骨多暴露者

諭安珠瑚徧察瘞之二十二年以疾乞休奉

旨安珠瑚自擢用將軍以來惟務邀譽沽名於職掌毫無  
補益大負委任聞其每向人言願來京師作部院文官



為人臣者苟能盡力報稱文武本屬一體有何分別且去歲在圍場與新任副都統通寶角口殊失官箴著革退發往吉林烏拉効力二十四年授索倫總管三十三年卒部臣請以其子安什布襲世職

諭曰安珠瑚因素有虛名用為將軍前朕東巡之時安珠瑚奏言臣所管官員兵丁皆藐視臣朕雖知其庸懦無能止革去將軍仍授為索倫總管終不改故轍不能約束所屬之人且自服官以來並無宣力之處所行專務

沽名其世職著革去不准承襲

伊桑阿

伊桑阿滿洲正黃旗人先世居瓦爾喀姓伊爾根  
覺羅順治九年進士由禮部六品筆帖式授主事

聖祖仁皇帝康熙三年授票本員外郎七年授刑部郎中  
十二年八月遷內閣侍讀學士十月擢內閣學士  
明年十二月充

經筵講官十四年十一月擢禮部右侍郎尋調戶部

右侍郎十五年十月

命同工部尚書龔如錫往視淮揚等處河工十六年四月  
轉戶部左侍郎尋擢工部尚書八月調戶部尚書時  
逆藩吳三桂據湖南

詔製烏船沙船由岳江入洞庭以斷賊糧道因

勅伊桑阿赴江南督造明年復偕刑部侍郎禪塔海赴茶  
陵督造戰艦二十一年准黃潰決

勅伊桑阿往勘兼籌海運事宜伊桑阿疏言黃河運道非

獨輸輓天庾卽商賈百貨賴以通達

國家在所必治若海運先需造船所費不貲且膠萊諸河淤塞已久開通匪易似屬難行

上是其言是年冬俄羅斯犯邊伊桑阿奉

命往寧古塔督修戰船明年六月調吏部尚書二十三年

四月旱

命同大學士王熙等清理刑部繫囚九月扈

蹕南巡奉

諭閱視海口伊桑阿疏言車路串場諸河及白駒丁溪草

堰諸口宜

勅河臣靳輔詳閱地勢挑濬深濶使高郵諸州縣減水壩

運河水口引流入海

上以靳輔督理黃河隄岸勢難兼顧海口

命安徽按察使于成龍分董其事二十四年五月調兵部

尚書明年轉禮部尚書二十七年授文華殿大學

士兼吏部尚書尋充纂修

三朝國史總裁官三十五年三月

命兼管兵部尚書事六月以臺站馬匹多斃部臣不預嚴飭又不効奏部議伊桑阿應革職得

旨從寬降三級留任三十六年

上親征噶爾丹

命伊桑阿往寧夏安設驛站尋同大學士阿蘭泰王熙允平定朔漠方略總裁官三十七年以年老乞休

上諭阿蘭泰曰伊桑阿厚重老成宣力年久爾二人自任

閣務以來凡事推誠布公不惟朕知之天下無不知者  
伊桑阿雖以年老求罷朕不忍令去也四十一年復以  
疾乞休得

旨卿品行端凝才識敏練勤勞歲久倚毗正殷今以老病  
乞休情詞懇切准以原官致仕仍著加意調攝以副朕  
篤念老臣至意四十二年七月卒年六十有六遺疏上  
得

旨伊桑阿歷練老成効力年久簡任機務鎮靜和平實心

任職自請告以來尚期優游頤養長享昇平用副眷注  
忽聞溘逝朕心深為軫悼下部議卹

賜祭葬如典禮謚文端

今上乾隆十二年同大學士馬齊入祀賢良祠

喀齊蘭

喀齊蘭滿洲正黃旗人姓伊爾根覺羅先世居九

爾喀地祖赫臣當

太祖高皇帝創業時率族屬來歸即俾轄之為佐領從征



烏拉有功奉使葉赫抗節不屈葉赫貝勒錦台什使人害之

太祖旋滅葉赫令其子克宜福刃讐人以祭父襲管佐領事天聰四年

太宗文皇帝征克明永平以克宜福為捉生將擊敗敵兵生擒二人獲馬十七又為前哨將斬明兵二獲馬一望見敵踞山結營馳還以告

太祖遣大臣率兵破之八年彙叙

開創以來諸臣功次予騎都尉職世襲固替崇德三年授吏  
部副理事官六年隨鄭親王濟爾哈朗圍明錦州  
其城東闕廂之蒙古諾木齊等謀內應為明將所  
覺圍困之克宜福衝入破敵陣援以出並護其家  
口來歸得

優賚

世祖章皇帝順治二年授

福陵總管而遇

恩詔晉世職三等輕車都尉尋卒喀齊蘭其次子也初由  
前鋒校襲管佐領授吏部理事官十三年署叅領  
隨寧海大將軍伊爾德剿明魯王朱以海遺黨於  
舟山屢戰皆捷凱旋紀功授護軍叅領

聖祖仁皇帝康熙十三年任前鋒叅領隨順承郡王勒爾  
錦討逆藩吳三桂十八年大軍自荊州渡江克復  
松滋縣都統根特副都統瑪爾齊哈令喀齊蘭率  
前鋒兵征澧州將薄城賊衆迎拒喀齊蘭擊潰之

轉戰追逐至江岸生擒三人獲燾幟軍械無算城  
中偽文武官以城降凱旋紀功擢正黃旗蒙古副  
都統二十一年六月調本旗滿洲副都統二十四  
年二月以疾乞罷

命原品致仕三十八年十月卒

賜祭葬如例子凱音布初襲克宜福三等輕車都尉世職  
仕至禮部尚書別有傳

穆占

穆占滿洲正黃旗人姓納喇先世為葉赫部長天命四年

太祖高皇帝征葉赫招降其貝勒錦台什之子德勒格爾授佐領予三等男爵及卒子南楚襲任護軍統領以罪削爵弟索勒和襲穆占為南楚之子初任侍衛兼佐領順治十六年署前鋒叅領隨都統卓洛前鋒統領伯勒赫圖駐防雲南時沅江土司那嵩作亂大軍剿滅之穆占預有功于三等輕車都尉

世職擢正黃旗滿洲副都統康熙十二年冬逆藩  
吳三桂反

聖祖仁皇帝命安西將軍赫葉副將軍瑚哩布由陝西四  
川進討以穆占署前鋒統領叅贊軍務十三年  
二月至陝西聞四川郡邑皆附賊叛鎮譚宏據陽  
平關穆占同西安將軍瓦爾喀率兵先驅擊潰賊  
衆於野狐嶺攻克陽平關及七盤關又敗偽總兵  
石存禮於朝天關陣擒偽遊擊王道成斬獲無算

六月進征保寧叛鎮吳之茂率賊數萬迎拒我軍  
鑿壕列營與賊相持賊數來犯穆占輒擊敗之十  
月賊劫我糧艘於略陽入阻截運道於槐樹驛及  
郿嶺穆占率兵通道屢擊敗賊衆以餉不繼同諸  
將還駐漢中值陝西提督王輔臣叛於寧羗據秦  
州平涼與吳之茂譚宏等聯結為寇穆占隨大將  
軍貝勒洞鄂還西安十四年二月

詔洞鄂征秦州平涼以穆占代赫葉為安西將軍率兵並

進偽總兵高鼎聚賊四千於隴州河岸立寨拒守  
穆占整陣搏戰殲賊甚衆連破賊寨遂趨秦州薄  
城攻圍賊屢出城抗拒皆督兵戰敗之復擊卻平  
涼赴援賊衆城中困蹙偽總兵陳萬策以城降穆  
占率兵往助提督張勇圍鞏昌遣陳萬策入城曉  
諭偽總兵陳科亦率衆降乃還會大軍征平涼十  
五年二月

上以洞鄂統師圍平涼日久未下



遣撫遠大將軍圖海代之六月王輔臣降穆占分剿餘賊  
於西和清水成縣禮縣收復城邑偽總兵周養民  
王好問等以慶陽府降九月

召入覲授都統品級佩征南將軍印率兵征湖南十六年  
正月至荊州時順承郡王勒克德渾守荊州貝勒  
尚善圍岳州安親王岳樂圍長沙簡親王喇布守  
吉安穆占奉

詔由岳州助攻長沙疏請移江南沙船百餘為水陸夾攻

之用

詔如所請七月

詔移兵會簡親王規取衡州永州值吳三桂分遣賊將掠  
江西穆占移兵袁州秣馬逾月擊卻賊衆之由永  
新犯吉安者遂進征茶陵逐賊至攸縣陣斬四千  
餘級生擒百餘人茶陵攸縣安仁鄱縣永寧俱復  
十七年閏三月攻克郴州桂陽招降桂東興寧宜  
章臨武藍山嘉禾永興穆占自駐郴州以都統宜里

布守永興四月賊犯永興穆占遣護軍統領哈克  
三前鋒統領碩岱等援之時簡親王尚駐吉安穆  
占請

旨趣其進征簡親王奏言穆占撤茶陵攸縣安仁之兵還  
郴州恐賊由永興占據要路江西可虞請

勅穆占先滅永興之賊穆占疏辯茶陵等處之兵未撤永  
興遣兵赴援郴州實為要地請

勅簡親王遣將來守臣乃可擊賊永興

上命穆占仍守郴州

諭趨簡親王進征簡親王乃移駐茶陵穆占疏請調江西  
提督趙賴隨簡親王部下將軍華善等率兵分守  
攸縣安仁等處得

旨自穆占至荊州後所奏調遣守禦事宜無不允行今破  
賊收疆穆占是賴其俱如所請六月賊將馬寶胡國柱  
并力犯永興我兵戰失利宜理布哈克三皆歿於  
陣賊遂連劫我營碩岱退入城副都統托岱等引

兵還郴州

上以穆占分兵防守閒地致永興兵單

諭責厚集兵力立功贖罪時簡親王遣前鋒統領薩克察  
由安仁援永興既入城以賊勢猖獗牒請益兵穆  
占辭以永興軍事簡親王主之薩克察遣人馳告  
簡親王遂以入奏

上諭責穆占曰凡因茶陵永興諸處軍事所降諭旨皆署  
穆占名於簡親王之前今穆占牒稱永興為簡親王之

地謬戾實甚自今以往毋分彼此合力剿滅逆賊八月  
賊將馬寶等聞吳三桂死焚永興賊壘引賊衆還  
衡州穆占自郴州遣兵敗賊於耒陽十八年二月  
率兵擊敗賊將郭應甫於常寧招降偽總兵李魁  
等追擊賊將吳國貴於永州俘斬甚衆復永州道  
州常寧新田永明江華東安進定廣西復全州灌  
陽興安恭城時桂林平樂南寧等府已為將軍莽  
依圖傳宏烈等收復穆占奉

詔還定湖南八月攻復新寧十一月

上命貝子彰泰為定遠平寇大將軍以穆占叅贊軍務十九年二月督兵擊敗賊將吳應麒等復沅州進征貴州十月至鎮遠賊將張足法楊應選宵遁復府城追剿逸賊復偏橋橋興隆二衛進定平越貴陽並遣兵收復安順石阡都勻等府二十年正月賊將高起隆夏國相王會王永清張足法楊應選等擁衆二萬餘於平遠西南倚山立寨穆占同提督趙

賴率兵衝擊高起隆等敗竄王會率所部降遂復  
平遠分遣副都統莽奕祿遊擊王成功等追剿逸  
賊擒斬偽巡撫張繼堅復大定府楊應選率衆降  
穆占隨彰泰進征雲南

上以貴州苗蠻雜處疆土新復

命穆占旋師鎮守尋因彰泰請仍

命隨征雲南十月合廣西四川而路兵攻雲南城三桂孫  
世璠自殺偽將軍線域等出降彰泰令穆占同都



統馬齊入城籍賊黨屬擒偽大學士方光琛等磔  
於軍門雲南平凱旋授正黃旗蒙古都統列議政  
大臣二十二年三月議政王大臣等追論穆占征  
保寧時奏軍事不實征平涼時不臨陣指揮後在  
郴州推諉不救永興應處絞籍沒奏入得

旨穆占雖有罪其勞績亦多罷任革世職餘罪寬免是年  
疾卒年五十有六

巴琿岱

巴琿岱滿洲正黃旗人一等侯伊爾德孫父托和  
齊任三等侍衛早卒順治十八年巴琿岱襲一等  
侯授散秩大臣康熙十九年擢正黃旗蒙古都統  
二十一年調正黃旗滿洲都統二十七年湖廣裁  
兵夏逢龍等作亂據武昌攻漢陽

上命巴琿岱為荊州將軍與振武將軍瓦岱等率師進討  
師至武昌逢龍棄城遁追至黃州降偽總兵趙得  
等擒逢龍於黃岡磔之三十年五月疏請於駐防

滿兵內每旗派百名學習鳥鎗得

旨允行十一月復任正黃旗滿洲都統三十五年三月

上親征噶爾丹增設每旗火器營大臣以巴琿岱管領正

黃旗授議政大臣尋定中路營制

命隨皇五子允禩率正黃旗兵以行五月

駕至克勒和朔以噶爾丹遁班師

命平北大將軍馬斯喀選輕騎追襲巴琿岱與都統齊世

武等叅贊軍務會西路撫遠大將軍費揚古已破

噶爾丹撤兵還九月扈

蹕巡北塞巴琿岱領右翼兵三十六年正月

命與都統蘇努等領噶爾丹

諭以整肅戎行勤恤馬力閏三月

遣大臣往擒伊拉古克三呼圖克圖分兩路進

命叅贊馬斯喀軍務十二月廷議以巴琿岱不急追伊拉

古克三呼圖克圖應革議政大臣及都統仍留侯

爵得

旨從寬留任四十年擢領侍衛內大臣四十五年

命往內扎薩克會盟四十八年正月

上以廷臣舉奏皇八子允禩

召見諸大臣

詰先舉者為誰其時領侍衛內大臣阿靈阿散秩大臣鄂

倫岱侍郎揆叙尚書王鴻緒私議保舉廷臣不即

舉出巴琿岱言是日宣

旨後臣等奏立皇太子事關係重大臣等何敢舉奉

諭爾等在行間俱能効命今正効命之日不可稍有隱諱  
於是臣等班坐會議衆欲舉允禩遂同入奏並無  
首先發言之人

上曰爾等所舉皆同大可疑矣必有倡首之人著作速詳  
查舉奏巴琿岱復奏臣等集坐一處並無倡首之人

上問領侍衛內大臣坡爾盆坡爾盆奏言臣等內巴琿岱  
先發言額駙尚之隆亦奏巴琿岱發言在先是實  
上曰朕知之矣此事必終國維馬齊以當舉允禩示意于

衆衆乃依阿立議耳馬齊奏實不知

上復命詳究巴琿岱等奏曰是日奉

諭此事着漢大臣盡所欲言臣等見漢大臣舉出允禩遂

同舉是實

上復問大學士張玉書玉書奏云會議日大學士馬齊先

臣到班臣問所舉為誰馬齊曾答云衆意欲舉允

禩

上命革馬齊職並

詰責佟國維事詳馬齊傳五十一年巴琿岱扈

蹕謁

孝陵

賜銀二千兩雍正元年卒

賜祭葬如例謚恪恭以第四子馬哈達降襲二等伯分一

雲騎尉與長子巴隆襲

欽定八旗通志卷一百五十



欽定四庫全書

欽定八旗通志卷一百五十一

人物志三十一

大臣傳十七

滿洲正黃旗五

傅達禮 烏丹

帥顏保

明珠 素丹 鄂克濟哈

查弼納

赫壽

帥顏保

帥顏保滿洲正黃旗人姓赫舍里大學士希福之次子也

聖祖仁皇帝康熙元年正月以希福自

太宗文皇帝時贊理機務勤勞素著

諭吏部視大學士范文程額色赫例擢用其子為學士遂  
授國史院學士六年四月教習庶吉士九月充纂  
修

世祖章帝實錄副總裁八年六月擢吏部右侍郎七月  
授漕運總督九月疏言淮安為水陸孔道乃十五  
里內連設三關其板閘鈔關與淮安倉之稅戶部

差員徵收清江廠船料等稅工部差員徵收胥役  
繁多商人耗費多端稽遲時日請以三關額課歸  
併一關徵收則胥役減而商民俱便疏下部議戶  
部言淮安倉稅應歸併淮安關工部言清江廠之  
稅為修造漕船經費宜分徵如舊

上以廠稅歸併一關亦不致虧課

命九卿科道再議如帥顏保所請九年正月疏言淮揚二  
府屬州縣上年夏季被水已奉

旨令督撫察勘災傷分數蠲免額賦其漕糧漕項例不蠲  
免而高郵州宿遷桃源鹽城贛榆等縣連歲歉收  
所有上年應徵及帶徵舊欠萬難併徵請

敕部議疏下部議令改折帶徵得

旨高郵等處災傷與他處不同其未完未徵漕米仍令帶  
徵恐小民不能完納以致困苦下部再議蠲免未完康

熙六七兩年漕米三萬一千餘石閏二月疏言戶

部行令漕項錢糧俱以制錢收放伏思漕項錢糧

非解部交納即給丁濟運以及修造漕船之需與  
本地支銷者不同且漕船行月白糧經費領運長  
途遇淺起剥遇溜添釐所費不貲勢難負錢遠涉  
應仍准徵銀支給疏下部議從之十二年正月同  
河道總督王光裕疏言舊例每年漕運全完河工  
歲修告竣舉劾所屬文武各官以示勸懲至康熙  
四年部議停止伏思漕糧徵兌匪易運解維艱且  
需多方催儻使如期抵通至黃河頂衝危險運河

旱勞疏濬惟賴經管各官竭力殫心不辭勞瘁庶  
河流循軌而漕艘得以飛輓若勤惰罔分恐因循  
貽誤請仍遵舊例每年分別舉劾疏下部議行於  
是疏薦山東糧道遲日吳河南糧道范周無錫知  
縣吳興祚等又劾罷溧陽知縣王錫琯等十三年  
十月以逆藩吳三桂窺犯江西需兵勸禦

詔率所部往駐十二月因安親王岳樂已統師抵南昌撤  
回十七年六月安親王進征湖南仍率兵鎮守南

昌九月移鎮吉安十八年三月疏言吉安各屬衆  
山連接逆賊盤踞出沒不時臣令副將色勒許壯  
猷遊擊章絃等率兵分堵緊要隘口斷賊糧道相  
機勦撫別令知府蔣維藩會同遣官入賊巢宣布  
勅諭招降偽總兵副將以下五十餘員兵萬餘十九年八  
月平南王尚之信為其護衛張永祥等首告跋扈  
怨望諸罪逮繫勘鞫

詔將軍賴塔以罪不株連諭慰藩屬

命帥顏保率兵至南雄韶州酌駐要地十月

命回漕運總督任二十年五月內陞工部尚書十二月調  
禮部尚書二十二年正月以疾解任二十三年十  
二月卒年四十有四

賜祭葬如例子赫奕由侍衛授內務府總管遷工部尚書  
見大臣表

明珠

明珠滿洲正黃旗人姓納喇葉赫貝勒錦台什之



孫也父尼雅哈當

太祖高皇帝滅葉赫時隨其兄德勒格爾來降授佐領屢從征有功

世祖章皇帝定鼎燕京予騎都尉世職順治三年卒長子振庫襲明珠其次子也由侍衛授鑾儀衛治儀正遷內務府郎中

聖祖仁皇帝康熙三年擢內務府總管五年授宏文院學士六年充纂修

世祖章皇帝實錄副總裁七年奉

命與工部尚書瑪爾賽閱淮揚河工定議修復興化縣之  
白駒場舊閘增鑿黃河北岸引河以脩蓄洩是年  
刑部尚書對喀納遷大學士明珠授刑部尚書八  
年以對喀納兼刑部尚書改明珠都察院左都御  
史十年二月充

經筵講官八月奏停巡鹽御史遍歷州縣之例十一  
月遷兵部尚書十二年正月

上幸南苑

閱八旗甲兵於晾鷹臺明珠先期布條教俾衆演習及期

軍容整肅

上諭之曰今日陳列甚善可著為令是年平南王尚可喜  
請撤藩移遼東吳三桂耿精忠亦以是請下議政  
王大臣會議時有謂三桂當久鎮雲南不可撤者  
明珠與戶部尚書米思翰刑部尚書莫洛等堅持  
宜撤遂以兩議上

詔從明珠等議十四年調吏部尚書十六年授武英殿大學士先是吳三桂反大學士索額圖謂因撤藩激變宜罪議撤諸臣

上弗許及耿精忠降尚之信

賜死吳逆殄滅

上宣諭廷臣以前議撤藩惟明珠與米思翰莫洛等為能稱

旨云二十一年議政王大臣等勘論耿精忠及其黨曾養

性等二十餘人罪狀擬奏如律

上召詢廷臣欲量予寬減明珠奏耿精忠罪浮於尚之信  
尚之信縱酒行兇口出妄言耿精忠負恩謀反悖  
逆尤甚法在不赦

上又諭以逆黨多人尚宜矜釋明珠奏此中惟陳夢雷金  
鏡田起蛟李學詩可寬

上仍命王大臣集議俱如明珠言於是陳夢雷等四人免  
死入旗為奴耿精忠曾養性等咸伏誅時

詔重修

太祖

太宗實錄及編纂

三朝聖訓

政治典訓

平定三逆方略

大清會典一統志明史皆以明珠為總裁官兩遇

實錄告成加太子太傅晉太子太師二十七年二月御史

郭琇疏劾明珠與大學士余國柱背公營私諸款  
一凡閣中票擬俱由明珠指揮輕重任意余國柱  
承其風旨即有舛錯同官不敢駁正

聖明時有詰責漫無省改即如陳紫芝叅劾張汧疏內并  
請議處保舉之員

上面諭九卿應一體嚴處票擬竟不之及一明珠凡奉

諭旨或稱其賢則向彼云由我力薦或稱其不善則向彼

云

上意不喜吾當從容挽救且任意增添以市恩立威因而  
要結羣心挾取貨賄至每日奏畢出中左門滿漢  
部院諸臣及其腹心拱立以待皆密語移時

上意無不宣露部院衙門稍有關係之事必請命而行一  
明珠連結黨羽滿洲則佛倫格思特及其族姪富  
拉塔錫珠等漢人之總攬者則余國柱結為死黨  
寄以腹心凡會議會推皆佛倫格斯特等把持而  
國柱更為之囊橐惟命是聽一督撫藩臬缺出余



國柱等無不展轉販鬻必索及滿欲而後止是以  
督撫等官愈事剝削小民重困今天下遭遇

聖主愛民如子而民間猶有未給足者皆債官搜索以奉

私門之所致也一康熙二十三年學道報滿之後

應陞學道之人率往論價九卿選擇時公然承風

缺皆預定由是學道皆多端取賄士風文教因之

大壞一靳輔與明珠余國柱交相固結每年糜費

河銀大半分肥所題用河官多出指授是以極力

庇護當下河初議開時彼以為必委任靳輔欣然  
欲行九卿亦無異詞及

上欲另委人則以于成龍方沐

聖眷舉出必當

上旨而成龍官止臬司可以統攝於是議題奏仍屬靳輔  
此時未有阻撓意也及靳輔張大其事與成龍議  
不合始一力阻撓皆由倚託大臣故敢如此一科  
道官有內陞出差者明珠余國柱率皆居功要索

至於考選科道即與之訂約凡有本章必須先行  
請問由是言官多受其牽制一明珠自知罪戾見  
人輒用柔顏甘語百計欺曲而陰行讐害意毒謀  
險最忌者言官恐發其奸狀當佛倫為總憲時見  
御史李時謙累奏稱

旨御史吳震方頗有叅劾即令借事排陷聞者駭懼以上  
各欺俱約畧指叅總之明珠一人其智術足以彌  
縫罪惡又有余國柱奸謀附和負

恩之罪罄竹難盡伏祈

霽威立加嚴譴天下人情無不欣暢奏入

上諭吏部曰國家建官分職經理庶政必須矢志精白大  
法小廉各守職業實心任事庶無負拔擢簡用之意朕  
親理萬幾歷有年所於爾部院大小官員行事無不深  
知為臣子者既儋爵受祿榮及父母庇及子孫家能自  
給便當知足無致隕越前已屢頒諭旨嚴行申誡又復  
諄諄面諭訓誨再三今在廷諸臣自大學士以下有職

掌官員以上全不恪勤乃職惟知早出衙署偷安自便  
三五成羣互相交結同年門生相為援引傾陷商謀私  
事徇庇同黨圖取貨賂作弊營私種種情狀確知已久  
九卿詹事科道皆朕委任之員凡遇會議自當各出已  
見公同商酌乃一二欲行倡率之人持議于前衆遂附  
和於後雷同草率一意詭隨又其甚者雖在會議之班  
茫無知識隨衆畫題希圖完結廷議如此國是何憑又  
有當集議時緘默自容及至領事巧於推卸朕深惡此

等推諉苟容之輩亦屢加嚴飭至於用人關係重大羣臣賢否難以周知故遇緊要員缺特令會同推舉原期為國得人實有裨益亦欲令被舉者警心易慮恐致溺職累及舉者因而勉自刻勵九卿諸臣宜體朕心從公選舉方為不負委任乃歷來所舉官員稱職者固有而貪黷匪類往往敗露此皆瞻徇情面植黨納賄所致凡茲情弊朕非不知前者班布爾善阿斯哈等身為大臣所行悖亂致干憲典遂行正法至今猶耿耿於懷是以比

來大小官員背公徇私交通貨賄朕雖洞見而不即指  
發冀其自知罪戾痛加省改庶可終始保全詎意積習  
深錮漫無悔悟如審擬蔡毓榮一案庇護挽救瞻徇黨  
類百計營求因朕具悉其奸私謀未遂近差塞楞額往  
審張汧被叅事情朕面諭塞楞額張汧居官貪穢爾宜  
嚴行審出迨差回時詢問塞楞額奏稱臣於此案盡心  
嚴鞫若有失實甘受誅戮及覽其奏案惟是累及保舉  
張汧之人竟為庇護朕知內閣原擬票簽將保舉張汧

官員并未議及業行折出又念張汧審結定罪之後自然發露因仍用原簽票發又靳輔下河工程屯田之案朕早已察其情弊特遣佛倫等前往勘議今所議殊屬偏私且凡會議之時科爾坤佛倫等務執已見持論好勝苟非懷挾私情何以力排衆議朕亦曾面加誡諭未見畏悔如此積弊愈久愈深物議沸騰輿情憤激以致言官列款叅奏本應發明其事以肅官方因不忍遽行加罪大臣且用兵之時有曾効勞績者故免其發覺勒



德洪明珠著革去大學士交與領侍衛內大臣酌用李之芳著休致回籍余國柱著革職科爾坤著以原品解任佛倫熊一瀟等著解任於河工案內完結嗣後大小臣工各以洗滌肺腸痛改陋習潔已奉公勉盡職掌以副朕寬大矜全咸與維新之至意尋授明珠為內大臣

二十九年

上命裕親王福全統兵征噶爾丹明珠與領侍衛內大臣索額圖等叅贊軍務尋以噶爾丹敗遁不行追剿

議罪降四級留任三十五年四月

上親征噶爾丹遣明珠與左都御史于成龍督運西路軍  
饗五月以噶爾丹敗遁班師明年

上復親征明珠扈從至寧夏奉

命撥駝運饗又偕學士黃茂齋白金頒賚鄂爾多斯隨征  
兵衆師還叙功復原級四十三年奉

命與內大臣阿密達等賑山東河南流民之就食京師者  
四十七年四月卒年七十有四

上遣皇子奠茶酒

賜祭葬如例

今上乾隆三十七年十月

諭曰國史館進呈新纂明珠列傳內所列郭琇糾叅各  
款臚採不全於核實紀載之義未合明珠在康熙年  
間身為大學士柄用有年乃竟不克自終漸至植黨  
營私市恩通賂勢熾熏灼物議沸騰

皇祖疊申

誠諭期得以恩禮保全而明珠不知省改致為郭琇叅奏復

念其於平定三藩時曾有贊理軍務微勞不即暴示罪狀然亦立予罷斥並未嘗廢法姑容後雖量為錄用僅授內大臣之職距其身沒二十餘年不復再加委任此實

皇祖恩威並用權衡纖毫不爽迥非三代以後所可幾及而確核明珠罪案祇在徇利太深結交太廣不能恪

守官箴要不致如前代之嚴嵩溫體仁輩竊弄威福  
竟敢陰排異已潛害忠良舉朝側目而莫可誰何也  
即如明珠以現任閣臣而郭琇即以露章牘款抨擊  
甚力使明珠果能如明季諸奸箝制言路則郭琇矢  
口之間早已禍不旋踵即或深謀修隙亦必多方狙  
伺假手擠排乃郭琇因此一疏遂以鯁直受

知不及二年即由僉都御史游擢都御史不聞明珠之黨  
有能為之抑沮者雖其間亦曾因事論黜而我

皇祖鑒其政績風力由閒廢中擢為湖廣總督後因紅苗搶奪隱隱不報削籍歸里其罪實由自致亦非明珠之黨藉事以為報復今郭琇列傳具在可攷而知也至於明珠生平是非功過原不相掩我

皇祖慎持予奪之柄至公至明因物付物恭繹

聖諭仁至義盡一一適如其人之所自取即此可以窺見萬一茲館臣裒輯明珠事蹟因檢閣庫未獲郭琇劾章似由當日

留中不下遂據館中所存郭琇疏稿刊本撮載大凡但其間刪削過多恐傳之既久或疑修史者有意曲為隱諱於据事直書之旨無當也因命於明珠傳中全列郭琇叅本俾天下後世得喻此事本末共知我國家立綱陳紀朝宇肅清從無有宵小僉壬如前代之得以怙權干政而我

皇祖聖明英斷刑賞持平實為執兩用中之極則朕稟承祖訓凡一切用人行政無不本此意為折衷用是剖悉原

委宣諭中外仍命錄載傳後使定論昭然永以示傳  
信而垂法戒焉

傅達禮

傅達禮滿洲正黃旗人姓吳雅由主事游陞員外  
郎卽中康熙六年授內秘書院侍讀學士十年正  
月改翰林院侍讀學士二月充

經筵講官尋又充

日講起居注官十二月擢掌院學士兼禮部侍郎



諭曰翰林院起居注職任重大關係機密朕以爾才品優  
卓實可信任故行簡用爾其黽勉以副朕意十一年正  
月教習庶吉士先是

上命儒臣翻譯大學衍義是年七月告成傳達禮奏請刊  
頒得

旨允行十二年四月

諭曰滿漢文義照字翻譯可通用者甚多後生子弟漸至  
差謬爾任翰林院可將滿語照漢文字彙發明某字應

如何用某字當某處用集成一書使有益於後學此書  
不必太急宜詳慎為之務期永遠可傳方為善也書成  
賜名清文鑑五月教習庶吉士七月重修

太宗文皇帝實錄充副總裁八月

命同禮部侍郎哲爾肯往雲南經理吳三桂撤藩起行事  
宜

諭曰因爾等遠往雲南料理遷移事務特賜朕所佩刀各  
一口良馬各二匹十一月三桂反被留十三年大兵由

湖廣進勦三桂釋傳達禮等還

上嘉其不屈於賊仍以原官用十四年以

經筵講章不稱

旨罷尋卒

烏丹

烏丹滿洲正黃旗人姓納喇葉赫貝勒錦台什之

曾孫也

聖祖仁皇帝康熙十一年以一等侍衛同學士郭廷祚往

視淮安河工決口繪圖還奏

詔河臣於宿遷至清河舊堤外增築遙隄以防衝溢十三年順承郡王勒爾錦統師湖廣討逆藩吳三桂烏丹奉使軍中宣

諭機宜旋以陝西提督王輔臣叛附三桂上命烏丹署副都統領兵駐守太原旋

命署建威將軍移兵潼關至即遣兵勦平華州商州諸賊十五年隨大將軍圖海征平涼賊據城北虎山墩

聯聲援通饗運烏丹督兵奮擊大創賊衆遂奪虎  
山墩俯攻平涼城輔臣惶懼乞降烏丹率數騎入  
城安撫降衆十七年授護軍統領時漢中興安尚  
為三桂賊黨所據

詔圖海進征以烏丹叅贊軍務尋分兵擊敗賊衆於牛頭  
山及香泉等處是年十二月圖海入

覲烏丹奉

命仍佩建威將軍印暫統大兵十八年九月

諭烏丹曰爾在朕左右有年稔知朕意應勇果任事叅贊  
大將軍機宜以立功勲十月圖海統師至鎮安縣偵知  
賊在梁河關烏丹繼將軍佛尼埒後進擊與偽總  
兵王遇隆戰於火神崖敗之渡乾玉河奪梁河關  
乘勝追勦恢復興安

上命圖海還駐鳳翔烏丹仍以建威將軍分統大兵繼將  
軍王進寶之後征四川烏丹疏請

敕西安甘肅兩巡撫速趣運饟至畧陽俾克乘時進取

詔如所請十九年正月烏丹先遣兵斷賊饗道自與王進

寶擊賊於蟠龍山錦屏山諸處大破之遂趨保寧  
奪浮橋斬關入城生擒偽將軍吳之茂張起龍偽  
總兵郭天春等保寧平時勇畧將軍趙良棟亦復  
成都烏丹與王進寶佛尼埒議分兵取順慶重慶  
佛尼埒先行招降順慶偽知府彭天壽等烏丹率  
兵至重慶偽將軍楊來嘉彭時亨偽總兵路之嵩  
江有倉等迎降於是達州東鄉太平新寧南江安

岳諸州縣悉定旋奉

詔取瀘州與趙良棟會兵進雲南七月良棟疏請

敕烏丹速滅永寧賊寇乘勝趨雲南

上諭曰烏丹往取瀘州行及一月何故猶未渡江其速令  
取瀘州勦除犯永寧諸處賊寇八月烏丹同佛尼埒領  
兵攻豹子山瀘州賊渡江遁令前鋒叅領博鼎等  
追擊之擒斬及溺死者無算十月良棟劾烏丹擁  
重兵二萬不急赴援致永寧再陷仁懷失守得



青成都去永寧不過七八百里烏丹不急赴援遲至六十餘日貽誤殊甚以宣威將軍鄂克濟哈統其兵進征烏丹解將軍任還漢中隨大將軍圖海鎮守二十一年還京議政王大臣等追論遲援永寧罪革護軍統領及佐領尋授為三等侍衛兼佐領二十九年七月喀爾喀扎薩克台吉額爾克阿海等率千餘人作亂而噶爾丹亦犯邊掠烏珠穆沁

上命裕親王福全征噶爾丹以烏丹隨師至烏蘭布通擊

敗賊衆噶爾丹竄遁裕親王遣烏丹同叅領色爾濟博爾和岱往偵噶爾丹所在行數日知已遠去乃還途遇喀爾喀賊衆剽掠烏丹與色爾濟博爾和岱並遇害議卹有差烏丹

賜祭葬如散秩大臣又視陣亡例予雲騎尉世職以其子巴什襲並

命巴什兼襲其叔父噶納海二等男爵

世宗憲皇帝雍正二年以烏丹入祀昭忠祠

素丹

素丹滿洲正黃旗人姓富察三等男斐雅斯哈之子也

聖祖仁皇帝康熙十一年素丹襲父爵授護軍叅領二十九年隨裕親王福全擊敗噶爾丹於烏闌布通中箭傷三十一年奉

命隨安北將軍郎坦勘視寧夏延綏西寧邊界明年擢護軍統領

詔同都統希佛統師駐大同預備征調三十二年郎坦擒  
獲哈密回人之輸稅厄魯特者訊知噶爾丹所在  
請發兵進剿

上命素丹赴軍前會議尋奏言噶爾丹自烏闌布通敗遁  
馬畜亡失部衆貧乏遷徙靡常以得所遊牧為幸  
必不敢復擾我邊疆可暫緩進剿其納稅厄魯特  
之哈密回人并請釋歸曉諭其酋以示畏懷意尋  
又以甘涼二府乏糧請移駐防兵於寧夏蘭州奏

入皆從之三十五年二月

上親征噶爾丹由中路進師

詔素丹率增發兵赴西路與撫遠大將軍費揚古刻期並

進尋

召赴行在統前鋒兵為嚮導視沿途所鑿井五月

上至克魯倫河素丹上言噶爾丹懾我軍威勢將奔竄請

上稍緩進征俟西路軍夾擊

上從之噶爾丹果遁走為西路軍擊敗師還以扈從勞

賜內廐馬一三十七年改授前鋒統領四十年以疾解任  
世宗憲皇帝雍正元年六月

賞銀一千兩

命以原銜往甘肅軍營効力時青海羅卜藏丹津逞逆

詔撫遠大將軍年羹堯帥師討之素丹叅贊軍事二年正

月西寧東北郭隆寺喇嘛為羅卜藏丹津所誘聚

衆叛素丹與提督岳鍾琪統兵進剿賊聚哈拉濟

溝我軍奮擊斬馘三千燬寨十乘夜追擊發賊山

谷伏兵三千盡殪之四月授正黃旗蒙古都統兼署固原提督十一月授寧夏將軍三年改正紅旗滿洲都統列議政大臣駐守陝西七年四月大軍征準噶爾素丹奉

詔率西安滿洲兵一千赴涼州策應七月卒於軍年七十有二

賜祭塋如典禮謚勤僖先是康熙四十年素丹有疾所襲父爵以長子素圖襲及雍正五年敘平青海功授

素丹三等輕車都尉世職以次子素章阿襲素圖  
自有傳

鄂克濟哈

鄂克濟哈滿洲正黃旗人姓納喇由侍衛署副都  
統兼佐領康熙十二年逆藩吳三桂叛分擾陝西  
湖廣十三年十月

上以河南府乃四達之地距潼關鄖襄皆近駐師其所  
在有警可策應



命鄂克濟哈偕副都統色格率每佐領驍騎三人往駐十  
二月逆鎮王輔臣叛於寧羌

命鄂克濟哈偕將軍阿密達率所部兵赴西安剿禦十四  
年正月

上以蘭州為近邊要地應遣兵駐守

命鄂克濟哈叅贊阿密達軍務移師蘭州剿禦并防階州  
文縣諸處三月鄂克濟哈擊賊於涇州城南擒斬  
偽總兵衛民譽等復涇州五月復敗賊衆於寧州

近城東山斬偽副將張三偽叅將王廷譽及賊衆  
八百餘復寧州得

肯嘉獎下部議叙十六年隨撫遠大將軍圖海進逼禮縣  
驛門等處敗賊於芭蕉園斬獲無算復塔什堡十  
七年九月議取漢中興安提督王進寶趙良棟將  
軍畢力克圖分路進鄂克濟哈隨圖海由興安進  
漢中興安相繼復十八年十二月圖海以漢中要  
地請撥滿兵千令鄂克濟哈領振武將軍印同副

都統恰塔駐守從之十九年正月進取四川

諭鄂克濟哈率漢中滿兵合將軍烏丹為良棟進寶後繼  
二月大兵分路進剿成都保寧相繼復

上以四川已定

諭鄂克濟哈同烏丹即精簡士卒馳赴重慶為進取雲貴

計三月

諭曰四川與雲貴接壤賊必乘間來犯其檄趙良棟同鄂  
克濟哈等於各要路立營深溝高壘堅為守禦八月

諭曰四川漢中滿兵雖為數不少今當進取雲貴着於滿  
洲蒙古漢軍每佐領下各派護軍二人驍騎四人共帶  
兵千人令護軍統領佟佳率赴四川既至鄂克濟哈同  
將軍烏丹酌量分為二路時湖廣提督徐治都疏報瀘  
州永寧諸處失守逆賊譚宏既降復叛閏八月鄂  
克濟哈以兵復瀘州九月擊賊於托川雅自午至  
酉奮勇大敗賊賊棄營遁捷

聞下部議敘十月良棟疏報賊犯仁懷烏丹擁兵不急援

致永寧失守得

昔成都距永寧不過七八百里烏丹不急赴援貽誤已甚  
著速解將軍任還漢中鎮守其四川官兵俱付鄂克濟  
哈統領與趙良棟會商進剿十一月鄂克濟哈疏言烏  
丹解將軍任後兩路官兵俱臣統領建昌永寧相  
距千餘里不能兼顧請分路進取

命署西安將軍佛尼勒為建威將軍領永寧一路兵與總  
督哈占會剿二十年三月鄂克濟哈等以建昌軍

棄城出自劾失援請嚴加處分

諭曰鄂克濟哈久駐成都既不能退敘州諸處來犯之賊復不馳援建昌以致失陷着解將軍印還漢中同將軍圖海守漢中諸處七月

召還尋授二等侍衛三十年授正黃旗副都統三十三年遷護軍統領三十四年八月

命偕副都統扎喇克圖巡邊十月噶爾丹擾喀爾喀遊牧上命調蒙古各扎薩克兵以鄂克濟哈現赴汛界所有蘓

尼特阿巴噶阿巴哈納爾各部兵

命領侍衛內大臣索額圖偕鄂克濟哈前往收集各駐要地偵禦三十五年隨征噶爾丹凱旋

命駐守寧夏三十八年卒

查弼納

查弼納滿洲正黃旗人姓完顏祖愛音布任戶部理事官

世祖章皇帝順治四年以考滿稱職予雲騎尉職世襲罔

替卒查弼納兄觀音保襲三遇

恩詔晉至三等輕車都尉從征雲南卒

聖祖仁皇帝康熙二十二年查弼納襲世職二十八年管  
佐領四十四年署護軍叅領四十七年授吏部郎  
中五十年遷內閣侍讀學士五十三年擢內閣學  
士充

玉牒副總裁官五十五年遷兵部侍郎明年充

經筵講官六十一年十月授江南江西總督



世宗憲皇帝雍正元年有流匪溫上貴結江西棚民藉閉  
糴為名樹旗謀掠萬載知縣施昭庭新昌知縣李  
珮調集鄉勇擊殺三百餘人擒溫上貴等十數人  
獲偽劄偽印鞫得上貴為臺灣逆匪朱一貴遺黨  
與十數人並伏誅於是大學士白潢尚書張廷玉  
並陳奏安戢棚民之策得

旨下查弼納詳議尋奏言江西界連福建湖廣廣東諸省  
地曠山深土人無力開墾率多招徠流民搭棚居

住種藝麻蕘名曰棚民但安業日久驅令回籍誠恐別生事端應編入保甲千戶以上添駐官弁稽察至編冊以後續到流移不得容隱其有脅力可用及讀書向學者准一體入籍應試疏下部議行二年閏四月奏請停止駐防兵巡拏私鹽專責所在州縣嚴緝九月奏言太湖跨連數郡盜匪易藏洞庭東山地當緊要請令新設叅將駐守其簡邨周鐵橋鮎魚口馬跡山龜山東山鳳川吳樓各令

脩弁分駐又言江南財賦重地知府稽察難周請  
改六安太倉潁泗廬邳海通等州為直隸而蘇松  
常三府增設元和震澤昭文新陽寶山鎮洋奉賢  
金山福泉南匯陽湖金匱荆溪等縣分任繁劇皆  
從之明年以保奏叅將等官六員同一考語傳

旨申飭又因疏奏盜案

諭曰查弭納條奏弭盜之法極似周詳乃一月之內盜案  
多至一百九件可見所奏盡屬欺飾耳總督統轄文武

弭盜是其專責其務實心嚴察以副朕意四年四月

召回京先是有

旨以尚書隆科多與貝勒蘇努及公鄂倫岱尚書阿爾松

阿等黨附交結事

詢問查弭納不以實奏至是

上親詢之語多支吾及革職勘問乃舉出王大臣等議請

正法

上曰朕昨降旨時言及

聖祖仁皇帝查弼納痛哭不止尚有良心且在兩江總督任內居官尚好今既舉出實情可寬免其罪尋授內務府總管兼鑲紅旗漢軍都統七月擢吏部尚書十月協理兵部尚書五年三月以濫保兵部郎中舒伸赴直隸水利効力部議革職得

旨降五級署兵部尚書十月予實授七年

上命發兵進剿準噶爾授內大臣傅爾丹為靖邊大將軍由北路入總督岳鍾琪為寧遠大將軍由西路入

查弼納奉

命赴肅州總理西路軍需明年十月

詔入覲授靖邊副將軍改赴北路九年六月噶爾丹策凌

遣賊三萬來犯北路我軍獲其偵卒詭稱賊酋大

策凌敦多卜道病留駐和博克山小策凌敦多卜

進牧在察罕哈達兵不滿千距我軍三日程查弼

納與傅爾丹信之令叅贊大臣素圖副都統岱豪

率兵三千先發尋遣前鋒統領定壽率兵一千五

百應援而自統軍繼之至庫列圖嶺與賊戰斬馘  
四百餘又賊兵二萬伏山谷從間道奄至衝突我  
營我軍力拒殺賊千餘時賊據險要我軍議移營  
至和通呼爾哈諾爾素圖定壽等引兵突圍多戰  
殲賊衆環逼我土默特兵潰散查弼納與傅爾丹  
及副將軍巴賽率兵四千設方營保護輜重且戰  
且行渡哈爾哈納河查弼納與傅爾丹相失力戰  
殲于陣巴賽亦被害事

聞

諭曰準噶爾賊衆侵犯北路將弁兵丁急欲滅此朝食忿激迎擊倉猝失利念此疆場効命之人皆國家養育多年朕特加選用冀其大樹功勲重邀爵賞伊等亦以世受國恩誓圖報効爭先恐後竭力捐軀雖誤墮狡計而矢死効忠情殊可憫其下部議卹

賜祭塋如例入祀昭忠祠予騎都尉加一雲騎尉世職其

舊襲之職例銷



恩詔所加止襲雲騎尉因合併為三等輕車都尉以其子  
那清阿襲

赫壽

赫壽滿洲正黃旗人姓舒穆祿初由筆帖式授內  
閣中書遷內閣侍讀康熙二十四年遷工科給事中  
尋轉刑科兼管廣善庫四十三年遷內閣侍讀學  
士旋擢內閣學士四十五年四月兼管太僕寺十  
二月授禮部右侍郎仍兼內閣行走明年充

經筵講官四十七年遷戶部左侍郎尋調吏部左侍郎四十八年正月

命往西藏協同內閣學士拉都琿辦事四十九年十二月擢漕運總督五十年八月疏言江西湖廣兩省漕糧給軍副米經御史王謙言條奏應如江南浙江兩省例部議令臣會同各督撫定議按舊制江西浙江湖廣正兌漕米每石加耗米四斗改兌漕米每石加耗米自四斗遞減至二斗二升不等以為

運丁盤淺起剥蒸折晒颶之費皆因程途有遠近  
所以徵給有多寡因地制宜軍民相安已久未可  
輕事更張從之十月疏言江浙漕船抵通積年掛  
欠甚多皆由水次出兌時以銀折米運丁沿途既  
乏副米輒侵用正米致抵通交倉虧缺宜于兌米  
水次令監兌官坐守糧道親歷稽察務須正耗行  
月并搭運各米槩行兌足上船如有折銀情弊州  
縣官照私自改折漕糧例革職仍追米歸款失察

之監兌官及糧道分別議處又江南省糧船三千五百餘浙江省糧船一千三百餘前後開行相去千有餘里每省派通判一員首尾不能兼顧請嗣後江南派七員浙江派三員押船抵通以有無掛欠分別加級降級積至三次實陞實降其兌次開行時即令監兌官督押抵淮如在淮盤驗短少懲責旗丁留其子弟一人令於產米處購買足數催船趕交押運官如仍短少將監兌官題叅其押運

千總定例每幫二員輪押實止一員領運或有事  
故勢必以一員領兩幫恐難兼顧請揀發在部候  
選千總三四十員遇缺派署向來千總押運全完  
例止加銜偶有掛欠即行革職人心未免隳阻嗣  
後有押運積年掛欠之幫而二運全完押運其次掛欠  
之幫而三運全完押運舊無掛欠之幫而五運全  
完者請予即陞其駕運旗丁向來每船開報一名  
或掛欠留通追比則回空無正丁請嗣後每船於

本丁兄弟子姪內增報副丁令十船正副丁連環保結能舉首折乾盜賣等弊者酌量給賞如隱匿不舉一丁治罪九丁責懲其旗丁向由衛守備報充嗣後應令千總先具保結加以府廳等官察驗方准充當其糧船過淮本定限三月以內而從前並無按限過淮者或遲至六月致回空守凍一年阻滯年年遲延請嗣後違限一二月者仍照例處分二三月以上者計日不計月分別議處疏下戶部

會同九卿詹事科道議皆如所請行五十一年巡撫張伯行疏劾總督噶禮會審科場作弊一案有通同賄賣隱情弗研究確供尚書張鵬翮因其子為噶禮屬員瞻顧掣肘噶禮亦疏劾張伯行翻駁命盜案件不能清理各款並得

旨解任質訊

諭九卿等曰此案察審實難若令滿大臣審則以為徇庇滿洲若令漢大臣審則以為徇庇漢人張伯行劾噶禮

連及張鵬翮意欲使之迴避今可令張鵬翮會同赫壽從公審理尋會奏張伯行誣劾噶禮賄賣舉人應革職贖徒噶禮劾張伯行不能清理案件是寔餘以會銜題咨舊事苛劾應降一級留任

上切責張鵬翮赫壽掩飾和解贍徇率結

遣尚書穆和倫張廷樞前往再讞詳見噶禮張伯行傳下九卿核議以噶禮張伯行不和表任事互相訐叅玷大臣職均議褫革



詔張伯行仍留原任噶禮依議革職九月以赫壽代噶禮  
為江南江西總督五十三年張伯行劾奏布政使  
牟欽元以交通海賊之上海縣人張令濤為幕友  
得

旨革欽元職下赫壽察審赫壽以搜捕弗獲且海中無賊  
入奏

詔張鵬翮同副都御史阿錫萬往勘五十四年五月覆奏  
張伯行虛捏誣陷請革職質訊

詔從之以赫壽暫署江寧巡撫十月丁母憂

上以江寧安徽兩巡撫俱新授未蒞事

命赫壽在任守制五十六年四月內遷理藩院尚書七月

靖逆將軍富寧安奏拿獲策妄阿喇布坦哨卒二

人問之云策妄阿喇布坦與俄羅斯哈薩克布魯

特皆為仇敵拉藏汗之子娶策旺阿喇布坦之女

三年已經生子達賴喇嘛班禪及拉藏之使俱在

策旺阿喇布坦處聞布木之子策凌敦多卜託卜

齊都噶爾三都克等率兵六千去年往阿里克處  
助拉藏汗征布魯克巴至今未回

上命赫壽以富寧安所奏宣

諭拉藏汗赫壽遵

上指致書拉藏汗言策妄阿布坦狡詐多端甚不可信我

蒙

皇上恩授理藩院尚書念昔時曾到爾處汗甚愛敬我故  
作書相告拉藏汗得書尋奏策妄阿喇布坦遣兵

據喀木衛藏地請

救發大兵即為策應

詔西安將軍額倫特等集兵救援詳見額倫特傳五十八

年九月赫壽卒

賜祭葬如例

欽定八旗通志卷一百五十一